

LIGJ
Nr. 39/2023

PËR DISA SHITESA DHE NDRYSHIME NË LIGJIN NR. 80/2020,
“PËR POLICINË E BURGJEVE”

Në mbështetje të neneve 78 dhe 83, pika 1, të Kushtetutës, me propozimin e Këshillit të Ministrave,

KUVENDI
I REPUBLIKËS SË SHQIPËRISË

VENDOSI:

Në ligjin nr. 80/2020, “Për Policinë e Burgjeve” bëhen këto shtesa dhe ndryshime:

Neni 1

Në nenin 14 bëhet ndryshimi i mëposhtëm:

1. Pika 2 ndryshohet si më poshtë:

“2. Punonjësit në Policinë e Burgjeve e mbajnë armën në përdorim personal edhe jashtë orëve të shërbimit, sipas kushteve të përcaktuara me vendim të Këshillit të Ministrave.”.

Neni 2

Pas nenit 18 shtohet neni 18/1 me këtë përmbajtje:

“Neni 18/1

E drejta për përfitim kredie me kushte lehtësuese

1. Punonjësi i Policisë së Burgjeve përfiton kredi për strehim me kushte lehtësuese.
2. Kriteret dhe procedura për përfitimin e kredisë me kushte lehtësuese dhe masa e saj përcaktohen me vendim të Këshillit të Ministrave.”.

Neni 3

Në pikën 1, të nenit 29 bëhen këto ndryshime dhe shtesa:

1. Shkronja “d” ndryshohet si më poshtë:

“d) nuk është dënuar me vendim të formës së prerë për kryerjen e një krimi apo një kundërvajtje penale me dashje;”.

2. Pas shkronjës “d” shtohet shkronja “d/1” me këtë përmbajtje:

“d/1) ndaj tij nuk është caktuar masa e sigurimit personal “arrest në burg” ose “arrest në shtëpi” për kryerjen e një vepre penale ose nuk ka marrë cilësinë e të pandehurit për një krim të kryer me dashje;”.

3. Shkronja “ë” shfuqizohet.

Neni 4

Në nenin 37, pika 4, shkronja “c” shfuqizohet.

Neni 5

Në nenin 38, pika 1, bëhen ndryshimet si më poshtë:

1. Shkronja “a” shfuqizohet.

2. Në shkronjën “b” pas fjalës “ekzekutive” shtohet fjala “mbikëqyrëse”.

Neni 6

Në nenin 42 bëhen këto ndryshime dhe shtesa:

1. Në pikën 1 fjala “Nëninspektor” zëvendësohet me fjalën “Inspektor”.

2. Në pikën 2, shkronja “a”, nënparagrafi “i” shfuqizohet.

3. Pas pikës 2, të nenit 42, shtohet pika 2/1 me këtë përmbajtje:

“2/1. Përfundimisht, punonjësi i rolit bazë, pavarësisht gradës, mund të marrë gradën “nënkomisar” kur plotëson kushtet e mëposhtme:

a) zotëron një diplomë të ciklit të dytë, të lëshuar nga institucionet e arsimit të lartë të licencuara dhe të akredituara sipas dispozitave në fuqi në kohën e lëshimit të diplomës ose të zotërojë një diplomë të të njëjtit cikël, të lëshuar nga një institucion i huaj i arsimit të lartë, të njohur e të njësuar pranë ministrisë përgjegjëse për arsimin;

b) është punonjës i rolit bazë për jo më pak se 2 vjet;

c) ka përfunduar me sukses trajnimin profesional për marrjen e gradës “nënkomisar”;

ç) ka vlerësim vjetor pozitiv të punës për periudhën që ka qëndruar në gradën që mban;

d) është shpallur fitues në procedurat konkurruese për ngritjen në gradë “nënkomisar”.”

Neni 7

Neni 51 ndryshohet si më poshtë:

“Neni 51 Pezullimi

1. Punonjësi i Policisë së Burgjeve pezullohet nga detyra kur:

a) ndaj tij caktohet masa e sigurimit personal “arrest në burg” ose “arrest në shtëpi” për kryerjen e një veprë penale; ose,

b) merr cilësinë e të pandehurit për një krim të kryer me dashje.

2. Gjatë periudhës së pezullimit punonjësi përfiton 50% të pagës për gradë.

3. Kur punonjësi i Policisë së Burgjeve shpallet i pafajshëm me vendim gjyqësor të formës së prerë, rikthehet në punë dhe kompensohet për pjesën e mbetur të pagës, që duhej të përfitonte nëse nuk do të ishte pezulluar.”.

Neni 8

Neni 55 ndryshohet si më poshtë:

“Neni 55

Rikthimi dhe përparësia për pranim në strukturat e Policisë së Burgjeve

1. Rikthimi në Policinë e Burgjeve mund të bëhet në çdo kohë vetëm për nevojat e Policisë së Burgjeve dhe nëse personi plotëson kërkesat e mëposhtme:

a) është liruar nga Policia e Burgjeve me kërkesën e tij për shkak të shkurtimit të funksionit ose për shkak të punësimit në struktura të tjera të administratës publike;

b) plotëson kriteret ligjore dhe profesionale të pozicionit të punës.

2. Kriteret për rikthimin në Policinë e Burgjeve vlerësohen nga struktura përgjegjëse për burimet njerëzore në Drejtorinë e Përgjithshme të Burgjeve, e cila përgatit raportin përfundimtar mbi përshtatshmërinë ose jo të kandidatit.

3. Punonjësi kandidat rikthehet në Policinë e Burgjeve në gradën që ka pasur para lirimit. Në rast të mungesës së vendit vakant me gradën e mëparshme dhe me pëlqimin e tij, ai pranohet në pozicion pune me gradë më të ulët.

4. Kanë përparësi për pranimin në Policinë e Burgjeve shtetasit që kanë përvojë pune në Policinë e Shtetit, Gardën e Republikës, Forcat e Armatosura, punonjësit e Shërbimit të Mbrojtjes nga Zjarri dhe Shpëtimi dhe që plotësojnë kriteret e mëposhtme:

a) janë liruar nga detyra me kërkesën e tyre ose janë liruar nga detyra për shkak të shkurtimit të funksionit;

b) plotësojnë kriteret ligjore dhe profesionale të pozicionit të punës.

5. Kriteret për përparësinë në pranimin në Policinë e Burgjeve vlerësohen nga struktura përgjegjëse për burimet njerëzore në Drejtorinë e Përgjithshme të Burgjeve, e cila përgatit raportin përfundimtar mbi përshtatshmërinë ose jo të kandidatit.

6. Punonjësi kandidat pranohet në Policinë e Burgjeve në gradën që ka pasur para lirimit. Në rast të mungesës së vendit vakant me gradën e mëparshme dhe me pëlqimin e tij, ai pranohet në pozicion pune me gradë më të ulët.

7. Punonjësit e rolit bazë dhe të mesëm emërohen nga drejtori i Përgjithshëm i Burgjeve mbi bazën e propozimit të drejtorit të Policisë së Burgjeve dhe punonjësit e rolit të lartë drejtues emërohen nga ministri i Drejtësisë, bazuar në propozimin e drejtorit të Përgjithshëm të Burgjeve.

8. Këshilli i Ministrave, me propozim të ministrit të Drejtësisë, ministrit të Mbrojtjes dhe ministrit përgjegjës për çështjet e rendit dhe të sigurisë publike, miraton rregullat për ekuivalentimin e gradave të Forcave të Armatosura të Republikës së Shqipërisë, Policisë së Shtetit, Gardës së Republikës dhe punonjësit e Shërbimit të Mbrojtjes nga Zjarri dhe Shpëtimi me gradat e Policisë së Burgjeve.”.

Neni 9

Dispozita tranzitore

1. Me hyrjen në fuqi të këtij ligji, punonjësit e Policisë të Burgjeve me gradën “Nëninspektor” marrin gradën “Inspektor”.

2. Koha e qëndrimit në gradën “Nëninspektor” të punonjësve të Policisë së Burgjeve, të parashikuar në pikën 1 të këtij neni, për efekt të ecurisë në gradë, konsiderohet si kohë e qëndrimit në gradën “Inspektor”.”

Neni 10

Hyrja në fuqi

Ky ligj hyn në fuqi 15 ditë pas botimit në Fletoren Zyrtare.

Miratuar në datën 8.6.2023.

Shpallur me dekretin nr.88, datë 26.6.2023, të Presidentit të Republikës së Shqipërisë, Bajram Begaj.